

## 09.03 MARELLA

### Dapli che «miau» e «wau» – umans che discurren cun animals

*Communicatur d'animals pretendan da pudair communitgar cun tut ils animals tras telepatia. La «Marella» fa in viadi en il mund fascinant, ma er dispitaivel da la communicaziun cun animals – e fa insaquantas experientschas e scuvertas remartgablas.*



Strusch insatgi che posseda in animal da chasa u da niz metta en dubi ch'igl exista per il solit in ferm liom emoziunal e comunicativ tranter possessura ed animal. Igl è ina sort communicaziun che va pli lunsch che dar cumonds sco «sesa» u «fa plaz» e da far obedientscha a quels. In pass pli enavant van uschenumnads communicatur u communicaturas d'animals. Quellas persunas pretendan da pudair communitgar cun tut ils animals pussaivels. Fitg concretamain, cun far dumondas, survegnir respostas u cun badar lur emoziuns. Quai è sco ch'i para pussaivel grazia ad abilitads telepaticas. E grazia a scolaziuns. Mintga persuna po numnadamain emprender a communitgar cun animals. La purschida da las communicaturas d'animals è tschertgada, adina dapli er en il Grischun. Possessurs d'animals vulan rinforzar il sensori per lur animals ed han adina pli gronda confidenza en la medischina alternativa. Quai fa dentant er pli e pli mal al venter a las persunas che lavuran en la medischina classica veterinara. In veterinari ed in'assistenta da veterinaria vegnan a pled en questa «Marella», gist sco in scienzià che ha fatg studis sorprendents sin quest champ. E la «Marella» guarda sur la spatla a communicaturas d'animals ed emprova d'explitgar l'inexplitgabel. E tgi sa, sche nossa redactura vegn sezza er da communitgar cun in cunigl?

*Redacziun: Olivia Spinatsch*